

# Sorumutuk Estraordináriu Konsellu Ministrus nian iha loron 29 fulan-dezemburu tinan 2020

## Prezidénsia Konsellu Ministrus

VIII Governu Konstitusionál

---

### Komunikadu Imprensa

Konsellu Ministrus hala'o sorumutuk iha Palásiu Governu, iha Dili, no aprova ona projetu Dekretu Governu nian, ne'ebé prezenta husi Primeiru-Ministru ein ezersísu, José Maria dos Reis, kona-ba **alterasaun dahuluk ba Dekretu Governu n. 18/2020, husi loron 3 fulan-dezemburu, kona-ba medida sira ba ezekusaun Deklarasaun Estadu Emerjénsia ne'ebé efetua husi Dekretu Prezidente Repúblika n. 70/2020, husi loron 3 fulan-dezemburu.** Hodi hatán ba agravamentu situasaun sanitária iha provínsia Timor Osidental, iha Repúblika Indonézia nian, ne'ebé konta ona ema 1700 hetan kazu pozitivu husi COVID-19, no deskobre tipu foun SARS-CoV-2, ne'ebé sei iha tan kontajioza duke orijinal no mós tamba aumenta número kazu ne'ebé diagnóstika iha territóriu nasional, presiza halo tuir medida foun sira hodi evita ba eziste surtu COVID-19 nian iha país. Ho alterasaun ida-ne'e, sei define filafali regra sira distansiamentu sosial nian, ba individuu hotu-hotu ne'ebé hela iha Timor-Leste obrigatóriu:

- Mantein distánsia pelumenus metru ida ba ema seluk, katak la moris ho ekonomia komún (hela iha uma hanesan), bainhira sirkula la'o ain iha dalan pública ka tama iha resintu, públiku ka privadu sira, husi asesu públiku no utilizaun kolektiva;
- Labele halibur malu ho ema nain sanulu, exetu sira pertense ba sira-nia agregadu família;
- La organiza nein partisipa iha eventu ka selebrasaun sira ne'ebé envolve aglomerasaun liuhusi ema nain sanulu, exetu sira pertense ba sira-nia agregadu familiár;
- Utiliza máskara ne'ebé taka inus noibun bainhira la'o iha dalan pública ka tama ka hela iha resintu públiku ka privadu husi asesu públiku no utilizaun kolektiva no, bainhira uza kualkér transporte públiku ba pasajeiru sira;
- Fase liman bainhira hakarak tama ka hela iha resintu públiku ka privadu sira husi asesu públiku no utilizaun kolektiva.

Aprova ona mós projetu Rezolusaun Governu nian, ne'ebé impoin serka **sanitária ida iha Rejiaun Administrativa Espesiál Oekusi Ambenu (RAEOA)** nian, hodi hatán ba kazu sira ne'ebé diagnóstika ho SARS-CoV-2 iha Rejiaun no atu kontrola saúde pública husi populasau RAEOA nian no impede okorensia transmisaun komunitáriu SARS-CoV-2 nian iha territóriu nasional. Ho projetu Rezolusaun Governu daudaun ne'e hodi taka postu fronteira sira ne'ebé iha RAEOA no bandu deslokasaun sira, husi dalan terrestre no husi tasi nian, entre iha rejiaun ida-ne'e no iha munisípiu sira seluk, to'o tuku 23h59 husi loron 2 fulan-janeiru tinan 2021. **REMATA**

url: <http://timor-leste.gov.tl?lang=tp&p=26377>